



Saunia e Elder Robert D. Hales

○ Le Korama a Aposetolo e Toasefululua

○ Le Ola e Faavavau —ia Iloa lo Tatou Tama Faalelagi ma Lona Alo, o Iesu Keriso

O le Atua ma Keriso o Laua moni lava o se Tama ma se Atalii—o ni tagata taitoatasi mavaevae ma eseese ua tuufaatasia atoa i lo La faamoemoega.

I le tele o tausaga ua mavae, sa ou maua ai se avanoa e suesue ai i molimau faaiu a perofeta i tisipenisi-one taitasi. Sa latou tuuina mai uma se tautinoga mamana e uiga i le Atua le Tama ma Lona Alo, o Iesu Keriso.

A o ou faitauina nei molimau—ma le tele o isi molimau faapena i le aluga o tausaga—na ootia lava au i le lagona o le loloto o le alofa o le Tama Faalelagi i Lona Alo ulumatua ma le auala ua faaalua ai e Iesu Lona alofa e ala i Lona usiusitai i le finagalo o Lona Tama. Ou te molimau atu a tatou faia le mea e talafeagai e iloa ai i Laua ma iloa ai lo La alolofa mo le tasi ma le isi o le a tatou maua “le meaalofa silisili o meaalofa uma a le Atua”—le ola e faavavau.¹ Aua “o le ola e faavavau foi lenei ia latou iloa oe le Atua moni e toatasi, atoa ma le ua e auina mai o Iesu Keriso lea.”²

E mafai faapefea ona avea lenei meaalofa ma ua meaalofa? E oo mai e

ala i se mataupu o faaaliga faaletagata lava ia, lea ua uma ona tautalagia ma aoaoina i lenei taeao.

E te manatua le taimi muamua na e iloa ai o loo i ai se Atua ma mafai ona lagonaina Lona alofa? A o ou tamaitiiti, sa masani ona ou sioa atu i fetu o le lagi ma mafaufau loloto ma lagonaina Lona afio ai. Sa faageetia au i le matamata atu i le matagofie ofoofogia o foafoaga a le Atua—mai lava i iniseti ninii e oo atu i laau uumi i lugā. A o ou iloa ina le matagofie o lenei lalolagi, sa ou iloa ina e alofa le Tama Faalelagi ia te au. Sa ou iloa o au o Sona atalii moni faaleagaga ma o i tatou uma o atalii ma afafine o le Atua.

Na faapefea ona ou iloa lenei mea? atonu tou te fesili ai. O loo aoao mai tusitusiga paia, “I ni isi ua tuuina mai i ai e le Agaga Paia ia latou iloa o Iesu Keriso o le Alo o le Atua, ma . . . i ni isi ua tuuina mai i ai ia talitonu ia

latou upu, ina ia mafai ona latou maua o le ola e faavavau pe afai latou te faamaoni pea.”³ Mai la’u lava vaai, e le faapea o le uiga o lenei mea o le a faavavau ai lava ona faalagolago nisi tagata i molimau a isi.

Sa tuputupu ae la’u lava ia molimau a o ou aoao e uiga i le Tama Faalelagi ma le Faaola mai aoaoga ma molimau a ou matua, faiaoga, tusitusiga paia—lea na ou faitauina ma le filiga—aemaise lava le Agaga Paia. A ou faaaogaina le faatuatua ma usiusitai i poloaiga, e molimau mai le Agaga Paia o mea sa ou aoaoina e moni. O le auala lenei sa ou iloa ai mo au lava ia.

I lenei faagasologa, o le saili atu mo faaaliga faaletagata lava ia, o le ki lea. Ua valaaulia e Nifae i tatou taitoatasi: ia “taumamafa fiafia i afioga a Keriso; aua faauta, o afioga a Keriso o le a tau mai ai ia te outou mea uma e tatau ona outou faia.”⁴

A o lei oo i lo’u valu tausaga, sa ou suesue ai ia iloa atili e uiga i le papatisoga. Sa ou faitau i tusitusiga paia ma tatalo. Sa ou aoao o le a ou mauaina le meaalofa o le Agaga Paia



pe a faamauina au. Sa amata foi ona ou malamalama o le Atua ma Keriso o Laua moni lava o se Tama ma se Atalii—o ni tagata taitoatasi mavaevae ma eseese ua tuufaatasia atoa i lo La faamoemoega. “Tatou [te] alolofa ia te [i Laua], aua na [La] muai alofa mai ia te i tatou.”⁵ Ma sa ou matauina pea lava pea le auala na La alolofa ai i le tasi ma le isi ma galulue faatasi ai mo lo tatou lelei. Faafofoga i nisi o nai mau e tele o loo aoao mai ai lenei upumoni:

A o aoao mai e uiga i le muai olaga, sa faasino atu le Tama Faalelagi ia Iesu Keriso o “lo’u Atalii Pele, o le o la’u Pele ma la’u Filifilia mai le amataga.”⁶ A o foafoaina e le Tama le lalolagi, sa Ia faia e ala i [Lona Atalii e] Toatasi na Fanaua.”⁷

Sa ta’u atu i le tina o Iesu, o Maria, o le a ia fanauina “le Alo o le Silisili ese.”⁸ Ma a o talavou Iesu, na Ia tau atu i Lona tina e “tatau ona i ai [o Ia] i le fale o [Lona] Tama.”⁹ I ni tausaga mulimuli ane, ina ua papatisoina le Faaola, sa fetalai mai le Tama Faalelagi mai le lagi, e faapea, “O lou Atalii pele lena, ua ou fiafia lava ia te ia.”¹⁰

Ina ia aoao Ona soo e tatalo, sa fetalai ai Iesu i upu nei:

“Lo matou Tama e, o i le lagi, ia paia lou suafa.

“Ia oo mai lou malo. Ia faia lou finagalo i le lalolagi e pei ona faia i le lagi.”¹¹

Sa Ia aoao atu ia Nikotemo, “Aua ua faapea lava ona alofa mai o le Atua i le lalolagi, ua ia au mai ai lona Atalii e toatasi.”¹² Ma sa Ia faamalamalama atu Ana vavega i le fetalai atu, “E le mafai e le Atalii ona fai o se mea na o ia lava; a o mea na te vaai atu i le Tama o faia, o mea foi o faia e ia, o loo faia foi ia lava mea e le Atalii.”¹³

A o tulalata atu i le itula o le Togiola, sa tatalo ai Iesu, ua faapea atu: “Lo’u Tama e, ua oo mai le aso. . . . Ua ou tuu atu le viiga ia te



oe i le lalolagi; ua ou faaumaina le galuega na e tuuina mai ia te au ou te faia.”¹⁴ Ona oo lea ina a o mamafatu a tatou agasala i Ona luga, sa Ia aioi ai, “Lo’u Tama e, afai e mafai, ia ave ese lenei ipu ia te au; a e aua le faia lo’u loto, a o lou finagalo.”¹⁵ I Ona toe taimi lava i luga o le satauro, sa tatalo ai Iesu, “Lo’u Tama e, ia e faamagaloina atu ia te i latou; aua ua latou le iloa le mea ua latou faia” ona alaga ai loa lea, “Lo’u Tama e, ou te tuuina atu lo’u nei agaga i ou aao.”¹⁶

Ona Ia asiasi atu lea i agaga o i latou o e ua maliliu, i le lalolagi o agaga, e tuu atu ia i “latou le mana e tutulai mai ai, pe a mavae lona toetu mai i le oti, e ulu atu i le malo o lona Tama.”¹⁷ Ina ua mavae le Toetu o le Faaola, sa Ia faaali atu ia Maria le Makatala, ma fetalai atu, “Ou te alu a’e i lo’u Tama ma [lo] outou Tama.”¹⁸

Ina ua afio atu o Ia i tagata i le konetineta o Amerika, sa faailoa atu e Lona Tama o Ia ma fetalai atu, “Faauta i lou Atalii Pele, o le ua ou fiafia lava i ai, o le ua ou faamamaluina ai lou igoa.”¹⁹ Ina ua afio ifo Iesu i tagata i le malumalu, sa Ia faailoa atu o Ia lava, e faapea: “Faauta, o Au o Iesu Keriso. . . . Ua Ou . . . faamamaluina lou Tama i

lou aveina i ou luga o agasala a le lalolagi.”²⁰ Ina ua Ia aoao mai Lana aoaoga faavae, sa Ia faamalamalama mai:

“O le mataupu lea na tuu mai e le Tama ia te au; ma ou te molimau atu e uiga i le Tama, ma e molimau mai le Tama e uiga ia te au.”²¹

“E moni . . . o le Tama ma a’u ua tasi.”²²

O mafai ona tatou vaaia se mamananu i nei mau o loo molimau mai i le Tama ma le Alo o ni tagata taitoatasi ma mavaevae? Ae faapefea la ona tasi Laua? E le faapea o Laua o se tagata e tasi ae ona o i Laua ua autasi i le faamoemoe, ma ua tuuto faatasi ia “aumaia le tino ola pea ma le ola faavavau o le tagata.”²³

O Iesu o se Atua, ae o loo faaaauu pea ona Ia tuueseina o Ia Lava o se tagata toatasi e ese mai [Lona Tama] e ala i le tatalo atu i Lona Tama ma fetalai atu o loo Ia faia le finagalo o Lona Tama. I le taimi o Lana galuega i sa Nifae, sa Ia aioi atu ai, “Le Tama e, ou te le tatalo mo le lalolagi, ae mo i latou ua e tuuina mai ia te au mai le lalolagi, . . . ina ia mafai ona ou i ai i totonu o i latou e pei ona i ai oe, le Tama, i totonu ia te au, ina ia tasi i tatou, ina ia faamamaluina au ia i latou.”²⁴



A mafaufau atu i lenei tulaga, e le o faateia i tatou i le amata ai o le Toefuataiga o le talalelei i le faaaliga o ni tagata faamamaluina se toalua ae le toatasi. I lea lava Uluai Faaaliga, sa molimau mai ai le Perofeta o Iosefa Samita: “Sa fetalai mai le tasi o i laua ia te au, ma fofoga mai ia te au i lo’u igoa ma fetalai mai, a’o tusi ane i le tasi—*O Lo’u Atalii Pele lenei. Faalogo ia te Ia.*”²⁵

O le perofeta talavou, sa alu atu i le togavao e saili po o le fea o ekalesia e tatau ona ia auai, sa ia alu atu ma se faatuatua e lē masalosalo, ma toefoi mai ma se malamalama ma se molimau o le Atua moni e toatasi ma Iesu Keriso, lea na auina mai e le Atua. O Iosefa e faapei foi o perofeta na mua-mua atu ia te ia, sa avea i le taimi lena ma se meafaigaluega mo le toefuataina mai i le lalolagi o le malamalama lea e tau atu i le ola e faavavau.

E mafai foi ona e saili i lo tatou Tama Faalelagi ma “lenei Iesu o le ua [molimau] i ai le au perofeta ma apose-tolo,”²⁶ i tusitusiga paia ma i lenei konafesi aoao. A e saili atu mo se molimau patino—lau oe faaaliga faaletagata lava ia—o le a e iloina ai ua saunia e le Tama Faalelagi se auala faapitoa mo oe ia iloa ai le upumoni mo oe lava ia: e ala i le tagata lona tolu o le Aiga Atua, o se peresona o agaga lea ua tatou iloina o le Agaga Paia.

“Ma pe a outou maua nei mea,”—e aofia ai ma mea ua ou faasoa atu i le asō—“Ou te apoapoi atu ia te outou ia outou ole atu i le Atua, le Tama Faavavau, i le suafa o Iesu Keriso, pe ua le moni ea nei mea; ma afai tou te ole atu ma le loto faamaoni, ma le manatu moni i ai, ma le faatuatua ia Keriso, o le a ia faaali mai le moni o ia mea ia te outou, i le mana o le Agaga Paia.

Ma o le mana o le Agaga Paia e mafai ona outou iloa ai [ma le mautino] le moni o mea uma lava.”²⁷

Uso e ma tuafafine, ou te molimau atu e finagalo le Tama Faalelagi ia i tatou ia saili i lenei malamalama i le taimi nei. O loo alaga mai le efuefu ia upu a le perofeta o Helamana: “Ia manatua, ia manatua o luga lava o le papa o lo tatou Togiola, o Keriso lea, le Alo o le Atua, e ao ina oulua atinae ai lo oulua faavae . . . , o se faavae lea afai e atiae ai tagata e le mafai lava ona pauu i latou.”²⁸ E moni lava, o le a tatou le toilalo ai.

O le faavae mautinoa o Iesu Keriso lea. O Ia “o le Papa o le Lagi.”²⁹ A tatou fausia o tatou fale e faavae ia te Ia, e to mai uaga o aso e gata ai, e ono oo mai lologa, ma e ono to mai matagi, ae o le a tatou le pauu lava. O le a tatou le toilalo, aua o le a faavae o tatou aiga ma auaiga i luga o Keriso.³⁰

Ou te molimau atu o se fale faapena, o “se fale o le mamalu.”³¹ O iina tatou te faatasitasi ai e tatalo i lo tatou Tama Faalelagi i le suafa o Iesu Keriso, Lona Alo Pele. O iina tatou te vivii atu ai ma avatu le faafetai ia i Laua. O iina tatou te maua ai le Agaga Paia ma le “folafolaga o le ola e faavavau [Na] te tuu [mai ia i tatou], o le mamalu lava lea o le malo selesitila.”³²

Ou te tuu atu la’u molimau faapitoa o lo tatou Faaola, o Iesu Keriso lea, o loo soifua o Ia, e alofa ma puipuia i tatou e lo tatou Tama Faalelagi e Faavavau, o loo i ai lo tatou perofeta i lenei tisipenisione—o Peresitene Thomas S. Monson—e taitaia ma taialaina i tatou. O loo molimau mai le Agaga Paia e moni lenei mea ia i latou taitoatasi o e o atu ma saili le malamalama. I le suafa o Iesu Keriso, amene. ■

FAAMATALAGA

1. Mataupu Faavae ma Feagaiga 14:7.
2. Ioane 17:3.
3. Mataupu Faavae ma Feagaiga 46:13–14.
4. 2 Nifae 32:3.
5. 1 Ioane 4:19.
6. Mose 4:2.
7. Mose 2:1.
8. Luka 1:32.
9. Luka 2:49.
10. Mataio 3:17.
11. Mataio 6:9–10.
12. Ioane 3:16.
13. Ioane 5:19; tagai foi i le fuaiupu 17.
14. Ioane 17:1, 4.
15. Mataio 26:39.
16. Luka 23:34, 46.
17. Mataupu Faavae ma Feagaiga 138:51.
18. Ioane 20:17.
19. 3 Nifae 11:7.
20. 3 Nifae 11:10–11.
21. 3 Nifae 11:32.
22. 3 Nifae 11:27.
23. Mose 1:39.
24. 3 Nifae 19:29.
25. Iosefa Samita—Talafaasolopito 1:17.
26. Eteru 12:41.
27. Moronae 10:4–5.
28. Helamana 5:12.
29. Mose 7:53.
30. Tagai 3 Nifae 14:24–25.
31. Mataupu Faavae ma Feagaiga 88:119; 109:8, 16.
32. Mataupu Faavae ma Feagaiga 88:4.